

意苕山館詩稿

意苕山館詩稿卷九

元和陸 嵩希孫著 男懋修九芝校

戊申

酬符南樵

葆森

忽逢湖海客我正未能歸非敢託同調何時共息機
恨牽南浦草夢繞北山薇會許辭塵網終當與爾依

遣懋兒旋里營屋

鳥知慮陰雨綢繆尙戶牖人生雖逆旅誰能忘井臼自我
困飢寒四方任奔走敝廬漸傾頽痛心棄鄰叟全家此聊
寄官舍本難久寇盜況突侵剽掠盡瓦缶側身干戈間遑
更計八口妖氛幸早散耿耿復星斗願此覆巢卵得完豈

非偶吞聲一室中萬事堪回首念昔杜陵老身處亂離後
倉皇走秦蜀真若喪家狗晚營浣花堂三載始斷手縱得
妻子迎終難故鄉守我才愧前賢所遇已云厚敢望此餘
生樂事備田畝茅屋但數椽差足容箕帚便當賦歸來調
飢亦何咎況茲先澤存忍使他人有汝歸姑經營慎勿意
忘苟爲語東西鄰有約定無負明年二三月好過牆頭酒

王烈婦詞爲李學使

煌側室作

王家有女年十九爲李大夫奉箕帚大夫奉使來江南妾
得從行侍左右大夫頭白妾顏紅妾命本如風中蓬風飛
蓬斷妾得知遑計星昴匪月同慘哉大夫病何急祈禱無
靈哭嗚咽飲酖不死梁縣繩地下追遲只三日吁嗟視死

眞如歸西風烈烈空堂吹雙棺遠望萬里去江濤日夜聲
流哀

寄和王研雲六十自述詩次韻

舊盟曾未鷺鷥寒寥落情懷付一官室有琴書聊自得
無松菊去猶難塵長不拂歡雖損經早能傳夢已安一昔
五陵裘馬客知君都作等閒看

扶風絳帳我曾經依舊孤燈永夜青念遠未應忘晦雨證
訛恰好對禰星遺編采輯垂家乘佳語流傳抵座銘學道
著書誰得似不教野史獨留亭

漕船行

蘇松漕賦天下稱歲輸百萬歸燕京運船額制高且大一

縣數十江頭橫黃頭兒郎好身手駕浪驅濤慣飛走一歲
江河一往還仰給官錢贍八口今年改運從直沽推輓不
復勞千夫江南大吏盡時彥斟酌今古應非疏腐儒無知
獨心戚官倉粒米皆民力軍船裝載遇水淺起駁尙恐遭
狼藉海潮萬丈兼天浮重洋經歷多龍蚪天庾正供冒此
險風濤猝遇能無憂盜賊年來況頻起宵旰憂勞正靡
已有司緝捕徒紛紛劫掠依然徧鄉里誰議海運豈不知
漕船夫役驕平時此輩麀然盡游手一朝失業將安之嗚
呼一朝失業將安之東南善策何人持

夷船忽復入江居民震恐

東南風起江潮平夷船又向金焦橫城中居民數萬戶火

輪重見譁相驚知府縣令亟親迓安民告示傳分明夷人
奉約別無意有事赴愬金陵城漕船水手正兇懼過此敢
復稱刀兵頗聞泊船燕磯畔報恩古寺閒游行路人瓦礫
互投擲鬼面流血爭逃生可知當日布章奏船堅破利原
虛聲胡然當事尙不悟鞭笞百姓求輸誠江頭停運卻可
畏腐儒別自心怍怍

上洋觀察行

上洋重鎮稱江東觀察駐此威望隆建幢樹燾儼開府體
制不與尋常同自從往年築新館鬼夷錯雜居城中蔑視
官吏若徒隸弁髦法令猶兒童今年漕船此停運撐篙拏
柁多閒工此輩自來恃勇健搏噬不避豺狼凶鬼夷卒爾

橫遭毒報仇直欲官相從胡忽觀察聽不應肆醫違願觀
瞻崇冠履倒置近十載養癰遺患將安窮青驄遽去代者
至夷情曲徇工彌縫腥羶充集復衢巷道旁觀者憤填膺
江南大吏負時望撫夷多術應論功似此觀察不曉事量
移猶見能包容惜哉金陵議和日觀察亦在朝天宮

寄沈鼎甫先生

三載相思路渺漫一書入手喜頻看感從深後渾忘賤交
到真時不論官講學平生知不負憂時懷抱幾曾寬明年
得遂歸耕願定許東山從謝安

積雨寫悶

雨聲淋浪聽不止十日芒屨阻衢市階前積水生漣漪門

外土牆半傾圯江南地土本苦卑溼氣蒸鬱恆黃霉度閣
衣履黢成點插架書帙黏難開敲斜學舍沉山麓下注飛
泉過茅屋終朝坐卧陂澤中四壁延蝸榻生蘚家人婦子
紛叫號如中蠱毒醺醇醪便欲束裝返鄉里高樓布席聊
相逃我聞近江數洲渚昨夜潮來沒禾黍屋廬簸盪水中
央駕板成梁少安處我居雖隘水未淹炊煙縷縷猶斜檐
歸心暫抵坐歎息凶年更恐飢寒兼

懷王佐卿

會是同經患難人相思三載不相親年荒夢屢隨鴈雁江
遠書難託逝鱗戰壘獨尋愁往日客帆分挂感殘春知君
歸計何時得定戀萊衣早乞身

牆後土山

域中半山水水平山則奇茲山土所積強以山名之有石
但一卷非有塊磊姿因隔衆山遠久遂不自知巍然比嵩
岱兀傲忘共嗤譬彼溝渠蓄妄詡江海支叢叢復細草旁
坳喜各私毋怪蕙與蘭不肯於此滋徒爲溼所聚蒸鬱苦
四時誰言天下山雲雨皆能施我居在其下瞻顧徒嗟咨

喜劉濟之

遊雙見過

杜噲託養病日午尙堅卧忽聞佳客來披衣亟起坐離愁
積十年數語那得破知君薦牘登不敢便君賀近來親民
官動卽得咎過例嚴催科條職重盜賊課藉非事上勤豈
易賢聲播君性厭翕熱置此或先情親老家苦貧進退定

無那我亦歸未能姑免忍寒餓坐久月欲升涼風動客座
與君共歎息蛩響暗相和

水災歎

家無半畝田水旱頗心切況經兵戈後民力已俱竭稔歲
幸屢逢粗糲得無缺何堪六月來愁霖正不絕江漲復夜
半呼號起倉卒圩岸盡決衝田廬半漂沒壯者攀樹逃存
亡未可必老弱救無人轉眼化魚鼈毋怪市中米騰價不
終日有司急征斂尙謂麥早實官租督仍完民困暇更卹
災黎數萬人江頭日行乞覩此心獨憂耿耿與誰說請看
齊魯間盜賊尙聯結豈非乏食民救死此相率弭亂貴未
形旁皇自一室

言
生世

生世何須歎不諧此身有盡死無涯但教排日書能讀豈
恨長貧願總乖婦好拈鍼老尙健孫知弄筆幼殊佳亂離
經過渾如夢肯遣閒愁更入懷

題沈玉生笑春仙館圖

瓊樓玉宇凌飛空珠簾不捲香溟濛瑤姬十二侍縹緲身
無仙骨誰能從相逢恰幸東陽子炯炯方瞳翦秋水箇中
自具龍虎經眼底能緝法華旨馳逐名場幾十春所悲過
眼皆浮塵便欲相從赤松子暮遊蓬島朝崑崙鐵券銅符
恨難得舉世空談攝生術不寫拈花寫散花悠然笑坐維
摩室知君妙悟非人間鼓琴敲竹求真詮一杯終許胡麻

乞流水桃花尙昔年愧我蹉跎負年少經樓却分今生到
願得置君圖畫中爲君執麪君休笑

庭藝雜花春夏閒俱無向榮意秋菊亦憔悴不堪采
摘

草木知天心應時各呈秀誰能當春夏不使遞繁茂今年
庭前花疏疏若非舊秋來菊滿畦顧影倍清瘦採掇殊未
堪落英亦罕覩譬彼婉孌子半面但微逗非有過時悲憔悴
抑何驟滋灌尙朝朝人力冀補救可堪霜漸零生意那
得復乖違知何因氣運且徐究

夜坐

秋已將深氣欲清空庭小坐晚涼生閒門盡日無人過落

葉行風時有聲

望懋兒不至

兒去我仍客何時得共歸故鄉雖好在老病欲何依秋盡
衣愁薄宵深夢轉稀一帆應早挂祇恐道途非

奉懷張小浦少宰

騶騎江干送暄寒已雨更遠瞻卿月麗回憶使星迎家世
崔盧並文章燕許衡冰壺欽朗抱玉尺仰高擎造士資公
望儲材盡世英冲懷真可挹淵度欲同傾械樸餘恩澤衡
茅亦頌聲從來霖雨沛卽自惠風生緬想還京路先殷報
國情靖共忘夙夜開濟矢生平遂有銓衡命羣欣藻鑑精
位高彌自抑德重善持盈鄧禹頭方黑邊韶腹共驚班兼

文苑領功識度支成龔待鹽梅和歌先喜起賡併懽期宙
合聞譽早蓬瀛猥以風塵走曾親月旦評趨承顏正忤拂
拭意偏誠揮塵原時戀騰賤未敢輕近傳同舍語猶念野
人名同官薛晚帆感激情何極驅馳夢獨縈祇慙鳧雁侶
但解鷺鷥盟卻望台星耀難沾雨露清明年重駐節許否
負前旌

董琴涵丈令孫康伯

韞琦

入學寄賀

一從南海泛歸舫鄉里人爭奉典型憂國尚煩雙鬢白傳
家還喜一衿青好添高密談經席卽傍遺山修史亭耆舊
襄陽待重問白雲休使戶常扃

鶴骨簫詩爲四明女史金八姑作

姑幼知書兼通音律適王氏子伉儷初甚篤有艷其才而謀得之者布讒於其夫因被棄焉姑之父訟於官官廉得其寃使卽堂皇重行合巹禮以鼓吹輿繖送歸而布灰之疑終不釋也久之姑託補陀進香自沈於海鄞之人哀之爲徵詩於四方而以鶴骨簫爲題簫姑所製也

巧製玲瓏一管留前身原是鳳皇儻可憐骨碎魂銷後無復和聲出玉樓

按律原殊截竹清此中哀怨却分明莫教吹入浮雲裏錯認秦樓引鳳聲

校秀水沈雲泉秋亭詩

論詩必少陵所見亦殊泥生非天寶時安用語輒涕我
朝盛風雅鼎鼎百年際漁洋不可作宛陵亦久逝獨知秀
水賢餘風未墜地尤者稱二沈和聲競棠棣往讀司勳詩
愬愬惜未既今來手此編反覆不嫌細雨窗正無聊觸眼
動古意格律知非矜性情此聊寄會逢乾嘉朝政事少缺
替優游山林閒俯仰默自契穆如誦清風古今想不異始
知詩盛衰本與世相繫何必哀江頭絕調變風繼我生恨
已晚掩卷感歎歎

秋感

一蟲始發聲百蟲響卽應啾啾階砌間有若答與贈微物
豈知秋默若順秋令我思造化功溫肅本各正胡爲秋易

悲淒氣若獨勝可知心無感百感自退聽憂患歷既多形體亦交病百年一炊黍惘惘將安竟

飢民船

朝來飢民船暮來飢民船飢民來何所審音半淮安老者面無色少者膚不完不食已三日問之心悲酸非無常平倉倉穀久沒官官府意惶遽亟亟議勸捐此閒數商富幸尙家儲寬十萬青銅錢踊躍輸江千飢腸雖無濟已得飽一餐所嗟瓜州口來者仍源源

一船十數人十船數逾百豈皆無業民赧顏此求食共指一翁言此本富田宅倉廩堆重重餘者換布帛水至不及防全家痛離析老翁急搖手淚已紛暗滴有婦抱一兒屢

欲江心溺云本土人妻忍死此朝夕其他更安論溝壑填
充塞存者尙無算面目少人色諸公雖樂施盡救豈可得
歸從官粥厥念此徒歎息

飢民雖可憐豈無不逞徒傳聞蘇常閒官道成畏途有船
便爭奪不顧嗥與呼居人盡驚恐老幼各自扶相戒早閉
門毋待日已晡幸尙畏王法一飽無他圖不然恣強悍所
至成荏苒要賴賢司牧綏定先通都毋使失巢雁哀罄徧

江湖

瀕江大寺院盡改棲流所留養已萬人來者更安處後船
去京口前船下陽武就食誠何心豈忘流離苦分插苟得
宜所過自安堵如何飛檄來驅之還故土故土儻可還誰

肯棄門戶彼豈走險鹿視如出柙虎羣慮知紛紛上告幸
大府關心念吾鄉夜夢警檣櫓

歲暮

白首仍爲客驚心歲又闌畏人聊閉戶久病未辭官傍郭
喧難避臨江氣倍寒兒曹知念我還與報平安

己酉

新年作

新年乍可破七日四日陰雨三日雪喜逢今朝天放晴人
意欣然若可悅仰觀天宇東方明檐前鵲噪聽聲聲凍雲
欲掃未盡掃紅日待生猶未生願得東風起南陌催動春
光散寒色開徧枝頭桃李花暫扶殘醉停金勒

人日飲沈玉生齋中賞菊

誰向東籬折一枝爲君相伴雪霜時
分明別抱淩寒意不許空山草木知

釀得延齡酒自誇故留秋色鬪春華
不關入座逢殷七開出人閒頃刻花

杜甫草堂詩未寄陶潛荒徑問何因
莫愁孤負探梅約故遣黃花刺眼新

題張淵甫瑞瓜圖

淵甫司鐸句容垂二十年年六十矣
去年忽得孿生子其門人作瑞瓜圖
以紀事蓋句容學宮本有元人所傳
五瑞圖瓜其一也又明宏治中學舍
旁曹氏兄弟孿生

一曰崑一曰岐同年成進士復同官太僕卿生之歲並
蒂瓜產於庭人以爲瑞故曰瑞瓜此圖之所仿而名也
淵甫勵學積德食報當無窮圖之作誰曰不宜因成此
以貽之

容山學舍廣數弓先生教士居其中十年不調意自得兩
鬢惟是驚攀髮雖然有子遠游宦不得侍養隨鼓鐘一編
兀兀抱終歲豈漫牋注誇魚蟲慨今宗法久不講睦嫻任
卹知誰隆徵經據史費尋討徑欲假此還純風諸生漸染
習禮教鄭賈應亦無其功況逢災年輟鉛槧不辭勞勩鳩
哀鴻窮黎全活識無算天意那弗豐其功瓜生並蒂信非
偶瑞應試聽呱聲洪曹卿故事豈足道達适突忽生方重

先生掀髯定一笑傳經預計他時同只愁堆盤但首稽未
免梨棗難爲供嗟余德薄枉相羨一子未忍謀歸宗願從
先生究宗法鈍翁之論吾焉從

喜聞閩浙官軍會勦漁山海盜盡殲其衆而歸

海中本是盜賊藪自殲蔡逆太平久不知何年復嘯聚余
山尾接漁山首往來商船心膽落礮擊檣摧死八九生者
勒贖不論錢纍纍白金量以斗沙船水手盡憤怒導引官
軍逆潮走夜深突入賊未防竟火其巢盡厥醜是時風雪
正怒號威助叢林失虎吼夔夔凱鼓振旅還露布飛騰告
我 后我思海島雖鷲深食盡焉能此永守誰齎盜糧豈
莫知養寇休徒武臣咎吁嗟乎東南頻年苦用兵至今

清言禾
九
二
宵旰憂朝廷諸公盡肯手擊賊庶幾四海皆昇平

張詠仙之官桃源歸自金沙作詩寄之

桃源瀕長淮其地苦卑溼民食賴熬鹽梟販此翕集入耳
少弦歌那更俎豆習君去百不宜坐卧意豈愜差喜人事
簡頗可古賢接到官兩月餘著述定滿篋是否家人攜得
免米鹽雜路阻書未來夜短夢難及相失恨金沙望斷江
頭楫

大水行

江湖夜捲風怒號勢若萬馬騰空槽沿江居民盡驚起登
屋攀樹爭先逃去年災黎尙滿目流離堪更今重遭忽傳
丹陽漢時郡浪駕采石兼天高城中小大萬千戶半化魚

鼈吞鯨鼉上流楚蜀復奔放焉有巨浸容滔滔潛振東壩
計豈得遺禍下及蘇常遙我聞惶遽不成寐枕畔徹夜掀
風濤雖無田廬有墳墓忍看漂沒同禾蒿朝來喜得故鄉
耗城版未灌猶平濠但願西風起奮迅汪洋亦易郊原消
西望江流發源處浩蕩萬里心憂切市頭斗米過六百食
盡誰忍飢腸熬議蠲議振但故事 宵旰獨使 深宮勞

魏默深刺史過訪有贈

魏公本是老經師往日聲名海內知學道從容忘客著
書慷慨識憂時螭坳日暖揮毫易燕寢香凝退食遲一別
十年驚草草燕雲楚雨總堪思

謝友寄菡鱸

慣嘗鮭菜樂原真又感純鱸寄遠人今日堆盤有兼味底
須更笑庾郎貧

屢誤歸期祇自哀江鄉風味舊曾陪莫疑病裏渾忘卻不
到秋風便寄來

秋懷

蘆荻荒荒水國秋客中扶病強登樓關心飢雀空倉噪極
目寒鴉枯樹投庾信詞章垂老賤王尼身世幾人憂一甌
欲敞歸無計落日高歌且未休

江干送客偶詠

無聊豈獨晚秋時病後心情百不宜偶爾江頭送行客妙
高臺下一題詩

岸頭積水未全消深淺何須更問潮指點夕陽明滅處敗
蘆殘荻兩蕭蕭

幾家茅屋近江邊水面風來荇藻牽正好午雞啼欲罷不
知何處有炊煙

小艇如飛喚不磨江心塔影失層層新沙一夜添無數浮
玉真堪策馬登

寄陶靜庵

貴鑑

并簡楊芸士

文蓀

同官踰半載君意頗我親夙昔雖未識本是同鄉人相聚
豈不樂念茲離別辰蒼蒼蒹葭色忽變桃李春感君遠相
憶寓書埒修鱗書中何所言含意若未伸楊君我舊友近
與君結鄰漫謂我能詩語君意諄諄豈知候蟲響但可任

草根況經喪亂後百病萃其身呻吟藥爐畔出語無一新
何敢更張膽得失憑君論他時尙湖曲定擬重尋君願將
載酒意并告楊子雲

校張詠仙詩畢題寄

眼前百事皆可憂江湖欲濟無扁舟美人渺渺隔天際空
山無伴聲誰求朝來忽墜青鸞使一卷新詩埒書至開緘
亟讀愁更愁中有難言無限事妖氛乍見海天銷汪洋又
看騰螭蛟東南秔稻苦不足哀鴻徧野聽警警霖雨蒼生
欲誰起東山高卧人往矣書生抱剗徒長吟有淚黃河不
能洗流連風月安足論近來長句推何人願將杜老江頭
詠高唱凌風萬里聞

挽沈鼎甫先生

搔首天難問，傷心殞老成。
關河恨遠隔，風雨夢還驚。
道在忘名位，交真見性情。
寢門吾敢哭，師友誼兼衡。
當代論民望，如公有幾人。
曾懷殊落落，氣象自閭閻。
愛士孔文舉，談經井大春。
無田歸獨早，不惜一官貧。
賜金知己盡，待火尙千家。
雪涕宜行路，停驅愧殯車。
歸難鑑湖乞，願竟菟裘賒。
任昉遺孤在，單寒孰共嗟。
書來曾幾日，一病竟何名。
心以憂時悴，身難去國輕。
傳家惟孝友，入世厭逢迎。
有道碑誰屬，追思淚欲傾。

偶作

世路崎嶇豈易平，鉤衣荆棘亦堪驚。
忘機付與閒鷗鷺，餘

詞林典故卷之七
粒憑他鳥雀爭

風波如此尙天涯爲戀青山一角斜祇是夕陽枯樹裏飛
飛先已搶歸鴉

寄懷張淵甫

當代論宗法津津孰與儔著書須有用入世定何求薄俗
知難挽純風竟欲留小儒應咋舌讓爾獨千秋

省試改期十月作示懋兒

我會號舍中風雨作重九淹忽二十年驚心已白首今年
過九月水退尙未久紛紛求試人襪被省門走候已小雪
交冰漸官河厚寒氣逼夜深脛骨慮難受沉聞癘疫傳必
遇災荒後不去良亦可萬事皆非偶徒念我先人得第每

逢酉勉強聽汝行朔風正江口試畢望早歸毋更徇朋友
留連雨花臺尋眺鍾山阜讀書務科名此志笑已負罷癡
我慣經得失亦何有

勸指歎

倉空噪飢雀野曠鳴哀鴻民食欲何賴鄉富頗急公紛紛
勸不足鞭扑隨其躬青錢數十萬堆積官倉中雖難待麥
熟已可備窮冬有司沾沾喜自謂此我功哀矜豈尙存公
道久不容嗟彼獻諛子稱頌忘面紅豈知 皇仁廣恫瘝
抱無窮不靳發棠請焉致屯膏凶民財盡搜括此豈盛世
風世無鄭監門痛哭吾誰從

米船謠

朝朝望米船暮暮望米船米船來何所上自兩湖接兩川
今年水災徧七省安得湖與川獨有餘米來源源朝朝暮
暮望米船米船不來躑躅江干窮民食盡官亦不自安招
徠商販得免關稅 皇仁寬我更有一言欲告我大官河
南山東麥大熟何不并免麥稅使麥滿市廛民卽無米亦
足飽一餐焉用朝朝暮暮望米船心知大官然不然西風
獨立使我心悲酸

哭徐秋士

生別且惻惻死別那更親自我與君別淹忽二十春中雖
幾相見草草安足論傷心歲癸卯君船泊江濱勉強赴官
去病已隨君身知我喪亂後閔我遭遇屯殷勤話夙昔君

意何諄諄心知歸難必誓言今猶存豈知此執手卽是永
訣辰茫茫數千里一慟何由伸嗟君髮甫燥名已驚其羣
春官乃十上罷耗徒風塵捧檄念親老驅馬聊三秦此本
帝王都氣象雄嶙峋古今恣憑弔肝膽輸輸困真如杜陵
老下筆如有神知君意頗適况乃民俗醇憂歸尙我諷大
可此結鄰恍如前日事思之淚盈巾我有舊相識昨來自
雍邠道君政殊美得比黯與恂共謀祀名宦不獨一縣民
致此豈易易感激知何因始知古循良抱負皆有真非如
彼俗吏身沒名隨湮死生事非細得失難具陳江頭望日
日喪車過麟麟會當盡一哭無待墓草新校年僅三歲君
先作陳人我衰益自悲地下誰尋君

寄妹餘杭

此生骨肉惟餘汝一別何堪更十年便令歲時常我在已
知歡笑異親前貧無鹿挽原非病聽到雞鳴每自憐鏡裏
麤頭白盡讀書惟是望甥賢

漢陽大火歎

漢陽繁華天下稱商船輻輳江頭停笙歌十里夜不斷燭
光燦燦搖疏櫺自從蛟涎毒爭吐淮南處處無乾土官鹽
價昂私鹽低岸引稽銷已默苦連宵焚惑夜有芒夢回忽
聽風聲狂鉤連鐵索救不得延燒三日成窟窿可憐歌舞
聲方寂百萬金錢化頃刻樹頭惟見青蚨飛夜深愁伴新
燐碧官山府海自古誇盛衰轉戰真堪嗟樊樓燈火平山

月風流吾欲思乾嘉

聞湖南有警

從古苗難格凶頑性孰窺舞干雖兩陛分竄卽三危迹本
豺狼近飢憂鴻雁隨脅從宜亟散毋使擾邊陲

顧湘舟以魏默深書來訪卽送旋里

相逢休說故鄉人各自天涯未一親卻愧尺書江上至重
煩蠟屐雨中頻手鈔萬卷身忘老家散千金意不貧可惜
恩恩當歲暮不教投轄效陳遵

懷張詠仙里門時以留司振局不赴桃源

卽今誰是濟時才徧野流鴻劇可哀莫道腐儒無一事振
災還要此人來

歲除

一笑浮生付夢婆
鏡中自看髮皤皤
詩於少作刪難盡
事過中年悔已多
寒壓朔風裘遲典
光搖殘燭酒微和
歲除便算今年好
骨肉團圓客裏過

意菴山館詩稿卷九終

孫潤庠曾孫家振校字

意若山館詩稿卷十

元和陸 嵩希孫著 男懋修九芝校

庚戌

元宵

客中佳節總無聊
病起餘寒況未銷
鎮日雨風聲裏過
不知今日是元宵

題王研雲坐看雲起圖

無端出岫本何心
孤負空山自古今
想得露琴風幔底
閒看罷一長吟

往事追思應共傷
悠悠南望路偏長
幾人親舍知長在
不敢低頭指故鄉

追悼錢塘程雪門明經

亂後無消息驚疑直至今豈知墳草宿還欲夢魂尋阮瑀
才名盡江淹別恨深可憐故人淚難灑舊時襟

內人生日

七十稱古稀六十已壽考幾見同心人頭白兩相保我幸
得偕子苦辛共少小忽忽數十年有若風過篠念子初來
歸容光頗皎皎戚黨爭相誇真足奉蘋藻三日過廟見被
體卻織縞操作卽躬親歡心得翁媪我時困估畢米鹽不
自了中饋賴獨持面目漸枯槁非獨事二親婦職盡寒燠
我有弟病瘵日夕暗祈禱臨危恨無兒放聲哭兒嫂子雖
不敢專心已怒如擣偕我稟高堂衰服易提抱親心正悲

傷聞語淚先掉誰家新婦賢大義如爾膽哀哉未踰年家
事益顛倒我父棄我去血淚徒擗擗苟延菽水謀養母走
遠道媪媪婦與姑相倚食辛蓼勉強薄祿營非厭菜根敲
亦翼息驅馳常得剝前繞此願且莫償返哺愧烏鳥婿嫁
奈未完忍痛此求飽倉皇鬼寇逢烽火逼城堡性命幸得
全往事更何道每與話庭闈淚痕輒盈瞭并曰幸免親兩
鬢已蓬葆阿翁昔有言回念心如絞謂願爾他年取婦如
爾好親恩報何時長歎仰穹昊我生積罪戾賴子補微藐
子今庶稍安祇恨歸不早今年設悅辰便擬階除掃一觴
晉兒孫毋使愁重攬會逢 國卹時敢自陳羸羸姑與成
此詩百歲期偕老

金山

傑閣凭闌望江流萬里長
片帆來極浦一鳥下斜陽
塔影凌波暗鐘聲入夜涼
新洲添幾許水患未應忘

懷唐春舫顧子雨吳子芾諸舊友

頭白何堪萬里行十年消息斷
郵程別時鄰里分新舊少
日交游半死生山郭樹迷鄉
夢遠海濤風捲旅魂驚相逢
莫怪人難識金榜都無羅隱名

對月

兀坐意不樂忽若有所思
古人隔千載亦既難見之
非無同心友半已人世辭
存者今無多又皆遠別離
世風日已薄人心日已非
新知異懷抱古道難共期
團團天邊月照

我猶昔時月既知我親我豈負月知夜夜守空庭不畏清
露滋向天默祈禱毋使雲雨施雲雨有反覆人事多差池
歎息復歎息誰能心無私

宣廟挽詞

孝慕終身冠古今追陪 慈馭痛黎黔百年恭儉成康業
卅載憂勤舜禹心不尙武功知 德厚欲停 郊配識哀
深小臣莫遂攀髯願望斷時巡玉輅臨

和王研雲扁豆詩

豆於百穀中本是菽之屬不知始何人作蔬雜葵藿扁者
生秋時延緣徧屋角垂垂燦紫英挺莢映添綠兼可伴秋
花清幽助籬菊斯味江鄉最登盤異常藪自君宦六安胸

經幾寒燠食此每不甘歸心動棖觸有人故鄉來攜贈滿
筠籠欣喜付烹調配鹽和以酪皮肥子圓綻誇譽劇童僕
彷彿舊田園風景憶猶熟蘇潤一水通異君隔川陸未必
種便殊但少市頭鬻寂寞此秋光到眼或不足差幸學舍
旁餘地饒花木因之課園童插架傍疏竹非獨備供饌亦
藉寄娛目本來疏水腸敢道鄙食肉已愧十年來全家飽
苜蓿況曾兵火經幸未卽溝壑容此養衰庸於我得非福
歸耕諒無期老圃笑徒學何時共故人翦蔬話衷曲

和嚴子秋

浦

雨中游焦山詩

冒雨尋山興本幽宵深還與一登樓卽看隔岸估帆聚卻
喜臨江戰壘收魚鳥有心嫌俗客風雲自古惜名流誰將

出處憑君計恨未芒屨共此遊

黃韻珊公車北上枉訪有贈

自我別君十六年知君念我心拳拳中間雖蓄一書寄意殊不盡言難宣江頭忽報片帆繫知是恩恩隨計吏相逢意外喜復驚不暇離情話瑣細袖中一卷冰雪詞性情自寫誰能知曉風殘月欲何限纏絲意興猶當時嗟我頭顱雪如許欲歸未得仍羈旅况經寇亂心半枯那更向人有新語方今四海望太平求賢明詔頒 朝廷獨長貧賤亦可恥勉旃慎勿輕浮名祇是此行太草草望遠徒令怨長道萬一歸尋鷗鷺盟毋忘乞食江頭老

六十初度

世無百歲人六十已稱壽我體素羸弱得此豈非偶獨念
少壯時歲月誤奔走自我二親沒始得博升斗爲養恨不
逮寸歡亦何有何若菽水供永不離左右松楸望依微缺
祭痛已久側身兵戈閒流離況入口積憤滿胷臆往事堪
回首生有兩男兒衣缺時露肘大兒先我死無子未立後
一棺尙淺土風雨空山阜爲父誠不慈淚落兒知否眼前
惟小兒顧影憐寡耦省試輒遭擯失學亦吾咎有孫稍可
喜四聲幼能剖十歲舉九經得天或差厚吾願雖不奢返
躬已顏忸嚴訓憶親承計年正八九期望親頗殷立身敢
或苟潦倒奈半生面目雜塵垢卻望此孩提成立學勤誘
年命安可知眞笑忘衰朽近嗟病時侵過存少親友勉強

整衣冠負鐸逐矇眊老妻殊我憐屢勸歸農畝謂不羨食
肉何不厭菘韭僕僕風塵中誰容此迂叟我非惜不知折
腰恥甘受奈逢歲屢荒餘米少盈缶遣兒營草堂兩載未
斷手滯留豈周南綢繆早戶牖往來姑金焦奚囊此常負
幸未詩腸枯無用澆以酒

董琴涵丈以乾隆庚戌與先子同入吳庠今歲重遊
泮宮成此奉寄並以誌感

門仰樛星紫氣開我我高聳牙冠來宦成南海華夷重歸
卧東山歲月催夾路旌旗爭顧望幾家冠蓋盛追陪微聞
耆老分明說六十年前小秀才

場來鬢序感前因曾是西清珥筆人一代詞林歸領袖三

朝公望重垂紳談兵慷慨遭時忌講學從容見性真垂老
不
忘
心
報
國
諸
生
何
幸
步
餘
塵

側聽園橋敘語溫舊時朋輩幾人存臨風應感山陽笛話
雨誰陪北海尊玉樹挺生原世澤蒲輪免召亦君恩得

歸定許牀頭拜先德頻煩與細論

先朝舊臣時俱
奉召入都

芹藻依然星紀遷因公我亦感行年

余亦成
歲入學

一龍未失庸

非幸初服難成祇自憐獨客琴尊虛夜月故鄉雲樹鎖春
煙宮牆一桁紅相隔望斷春風杖履前

沈玉生自里門赴白下來晤卽別

君從故鄉來問君故鄉事去年故鄉水聞已門前至幾家
稍爽塏魚鼈未須避入冬定全涸或有可耕地潤州泛江

潮水退頗不易春來麥隴閒雙歧忽挺異有生所未逢老
農感交涕我鄉近何如嘉祥竊心冀君言將毋同豐歉皆
天意兩歧安足論三穗君知未嗟嗟兩腐儒頭白天涯寄
家雖半畝無心尙災黎計敢爲越俎謀妄預當官議世無
獨飽人歲豐庶趨義況聞川廣閒民皆有生氣一歡且今
朝江頭纜姑繫

送陸淞帆應祥入都

斯人廉吏後何乃竟長貧頭白仍爲客時艱不惜身十年
幾相見千里更誰親望望京華路能無一愴神

寄沈廉仲宗濟禾中

病魔遣不去中夜生旁皇朝聞故人至急起扶匡牀離別

雖未久欲語先意傷雍容盛萊絲忽變麻衣裳自我依先
公白嶽黃山旁捉襟肘欲見忍飢面羞黃相憐感公厚拂
拭增容光一爲金臺別十載催星霜海氛忽不靖鼙鼓騰
倉皇金焦北固閒慘見成戰場公聞遽驚愕消息探不遑
亂定一書寄憂國心彌長前年 予告歸枉顧喜欲狂烹
蔬話終日愧未羅酒漿君家好兄弟隨侍方洋洋方謂免
朝請正可任翱翔何意僅三載遽爾還大荒君兄宦京邸
湯藥不得嘗獨君奉左右那不悲斷腸赴書遠相寄哀痛
難自量君今訪親故歸從石城航豈料道旁值葛屨哀檣
康何弗且歸去亟謀表瀧岡勉期吹墳篋同聲追歐陽迢
迢路相隔欲訴恨難詳寫此寄相憶餘淚猶浪浪

哭王亥坪同守寄令子暨方昆仲

忽傳消息惡入耳尙驚疑豈意三年別真無再見期江流
變鳴咽山色莽淒其不得憑棺訣臨風涕淚垂

薄宦原非計勞勞誤此身不嫌上官忤偏喜腐儒親思古
情同切憂時意獨真拂衣竟歸去相失恨江濱

不堪聞赴日重憶到官年兵燹驚方過災黎痛滿前每憂
風未古欲望雪盈顛他日論名宦誰能先此賢

隔歲書猶在重看淚滿纓得歸原樂事有子況成名正望
蒲輪奉仍隨竹馬迎傷心今已矣後死更何情

答顧子雨四明寄懷之作

畏人常閉關積懶遂成癖一二蓬蓽交有懷尙不釋晨起

鵲噪檐剝啄豈有客違道一書來欣喜動顏色開緘且未
看往事多感激鹿城識君初風雨試聯席一賦飯後鐘聲
響兩藉藉爾時正少年意興欲何極蘇婁一水通過從易
晨夕廿載困名場須髯遽如戟飢寒奈交驅蹤迹異南北
自從兵興來人事愈促迫我於飛礮中一死免幸獲妻子
泣相送顧存少親識苟延近十年白雪已盈額持書誦回
環纏緜愴今昔知君向平累垂老尙役役一挂吳興帆再
上四明船四明我舊游風景異荒僻海氛一不靖市兒習
鋒鏑方今 聖化新鬼腥亦應滌君觀海門潮諒猶動心
魄泠泠蒼誓間是我先人宅松楸今如新缺祭歲久積根
觸因君詩流涕被胷臆何時許歸耕來往昇山側相尋蕘

笠傳遠勝錯袞烏君意定如何塵鞅亦當息夕陽樹頭紅
細草江干碧相望不相見離情倍脈脈

偶成

屋廬深處少塵埃門對青山鎮不開小鳥亦知人意懶飛
飛不肯入簾來
幾閒茅屋任敲斜一角紅牆曲曲遮可惜萬竿修竹裏不
棲鸞鳳只棲鴉

新秋

西風颯颯雨纖纖鎮日虛堂不捲簾濁酒自嫌愁裏對新
涼時畏病中添更無長計營蓑笠未免關心問米鹽贏得
山妻成一笑不如險韻且重拈

寄黃韻珊

風塵何處撲征衫料得江鄉早卸帆
多事十年情略詆轉教一別恨難芟
藥爐茗椀真無賴綠水青山信不凡
便欲署他鷗鷺長爲君商略好頭銜

憎蠅

爾從何處來營營乃此集初但牆壁
依漸乃簾幙入引類槩梳開坳熱性
所習向曠卽薨薨當晝更翕翕深恐亂
我聰不但擾吾頰玷污偶不防素衣已
暗襲其害並細蚊肌膚肆攢嚼驅之去
復還麈尾倦手執得氣知幾時暄溽會
更躡何勿早潛蹤毋待西風急

金沙舟暮

水田漠漠接陂塘
叱犢人歸正夕陽
一路好風吹不斷
稻花香勝藕花香

與曹二香

朝卸江上帆
暮叩故人室
故人方呻吟
吟我來喜欲失
扶病出相見
細語訴難畢
同官四五人
歡聚憶當日
淹忽會幾時
已是半存沒
阮公最強健
今又撤琴瑟
我時屏藥爐
亦未逾市月
相對各自憐
一身臄皮骨
迢迢故鄉水
非有千里關
買山奈無資
監河粟誰乞
雖居聖明朝
登進方羣傑
疇甘坐廢棄
沒世不自疾
奈茲兩病軀
腰已不堪折
西風起蕭蕭
木葉警初脫
加餐願同勉
勿藥喜有吉
就令許歸耕
得終老
蓬篚亦當健
腰脚毋但仗
卽粟往來桑麻閒

晚景庶可悅談深坐忘久夕陽欲西匿鄰笛聽山陽悲來
正不絕

中秋大風雨金沙寓館作

飄風暴雨朝不終滿望皓月成秋中豈意三日不休歇家
家蓋屋無纖蓬高原積水忽盈尺低田淹沒迷西東連年
水患四方告米價直欲珍珠同飢民乏食聚成盜道路剽
掠居然公雖喜今年麥大熟所望要在秋收豐闔閭氣象
庶一變堪更原隰俱成空此閒衝決已可畏近江圩岸愁
交攻荒齋半敲傍城築下瞰北固濤洶洶家人今夜定惶
懼過涉滅頂占知凶此尙私憂未足道高枕終必無哀鴻
安得喚回風雨師稍留殘稻安愚蒙

旅夜

病骨支離甚經秋更不支
可堪羈旅夜復此雨風時
怪鳥嘒深樹叢蛙亂曲池
終宵渾不寐心事欲誰知

挽阮淦亭

命龍

昨冬至今夏已哭兩故人
可堪淚未乾又此來哭君
君初頗我違相見不一親
我復懶成癖亦遂無晨昏
倏逾三載過從稍兩殷
我知君情厚君識我意真
我苟有過舉規我恆諄諄
察君性伉直於物無所徇
遇有拂意事動輒生怒
曠得免衆交忤事過悔亦
頻我時效鍼砭不待言畢
伸亟起把我臂謂當書諸
紳念昨盛暑際我方病重
茵君來戒勿藥出門屢逡
巡何意未弔月我反招君
魂嗟君守盤

藉已踰二十春百願未償一勞苦徒風塵君有四男子少
者殊恂恂餘皆廢弦誦未免爲愚民隱憾抱莫釋語我常
酸辛君病或坐此果爾君其慎堪悲更往日鬼難遭遭迤
不死亦偶爾家室知誰存亂後各相弔白髮驚添新此痛
尙如昨哭君君豈聞西風動總帳涕淚空沾巾

重九

客中今日又重陽獨自登高一暗傷到眼江山餘戰墨驚
心風雨作年荒丹楓不改舊時色黃菊卻爲故國香那得
白衣還送酒鄉關望斷路茫茫

黃韻珊挈其姬人赴皖阻風京口重來話舊

望君久不來定知君歸去今來自何所尙疑夢中遇君言

一舸停江頭載將絡秀龍山遊龍山風景本清絕我曾蠟
屐逢深秋君去楓林正一色載酒尋詩興何極雖今翩翩
非年少豈必風流遠殊昔淺斟低唱知何人一枝詞筆屯
田新美人才士自千古定有圖畫傳江津只是春風動賓
館寂寞家園問誰管願得歸帆早日縣休令芳草閒階滿
葉青原自浙入都來晤

一別心驚十六年重逢草草九秋天漫愁薄宦全家滯卻
喜循名衆口傳患難共經憐我老簿書猶困惜君賢歸來
願爾雙旌換快與金焦袂共聯

乞人畫山水

江上金焦兩點環十年來往翠微閒江山如此不能住卻

笑從人乞畫山

野望

野曠天宇高四望氣清肅
蛩聲寂不聞蕭蕭但落木
心念田閒禾高低應全熟
荒歉嗟頻年積水滿溝瀆
轉徙雖得歸傾圯尙茅屋
炊煙起幾家衣食得豐足
相戒租吏來雞豕具宜速
咨嗟聽老農歸途意躑躅

張詠仙寫潤州論詩圖見寄索詩

君詩我能知君畫我未識
開緘忽寸絹訝潑淋漓墨
彷彿几案前雲氣暗壅塞
贊歎且未遑撫玩動感激
念當兵燹過君來主講席
北固金焦閒題詩徧崖壁
餘氛賴一洗江山遽改色
就我移匡牀唱和每晨夕
慨想乾嘉來詩教失

典則空疏託性靈險怪破格律抗論恆宵深兩情彌相得
淹忽會幾時須鬢各添白著我畫圖中相對脫冠幘風聲
起林梢燈影出窗隙一甌坐將做意興豈猶昔君時薦爲
縣聲名正藉藉行當戒舟車鳴琴赴京國此事幸毋廢非
徒紀行役必遇佳山水更煩繪成冊持歸示鄉人足抵卧
游適自從風雅衰政但催科迫那得弦誦聲傳播滿都邑
望君政早成歸卧煙蘿碧相從話平生留此證陳迹

秋懷

未央宮殿敞崔巍紫氣紛看北斗回萬國衣冠欽玉陛九
霄雨露下銅臺紀綱不待鳴鞭肅讜直先聞賜筴開何事
羽書傳絡繹安危豈獨少邊才

一從滄海見揚塵，跋浪魚龍久未馴。
列堠烽煙銷幾處，嚴營刁斗肅何人。
時無頗牧憂原切，邑有龔黃化自神。
但使耕桑俱樂業，誰輕一死著黃巾。

妖氛萬丈桂林城，露布頻傳賊未平。
元祐急徵司馬相，西陲先駐范公兵。
六州士女盍漿待，十洞苗獠囊鞬迎。
計日脅從應解散，平林新市盡蒼生。

寶劍高懸萬象休，金甌無缺此神州。
東南不盡魚鹽利，西北先平竹箭流。
對策已聞收賈董，持籌何用借桓劉。
只愁囊笠江邊老，匏葉空歌冷釣舟。

書曹給諫

柳堅

南糧改折疏後，不擬寄曹比杜和元。

云爾

東南困轉漕比屋無餘糧舳舻互千里勞苦輸京倉當事
議改折其意豈不良所嗟十年來徧地愁銀荒一兩準斛
米取民原無傷苟於正供外耗羨百不將國用既無缺民
食豈有妨奈彼倉胥吏誰肯虛囊囊加折儻倍徙閩閩實
旁皇況茲運船夫率皆稱強梁平時習剽掠失業安可量
非如兵興歲得充黑衣行此必徇州縣謀國安得臧吾鄉
髯御史奮袖爭朝堂得 旨俞所請 聖恩自非常敢謂
力回天況本循舊章所願吏奉法勿竭私家藏輸官有餘
粟俾足充飢腸軍船挂帆去歡聲滿途旁可憐蘇松郡夙
稱秔稻鄉城中萬千戶積穀誰倉箱改折果無弊捆載回
餘艘菽粟比水火何歲非豐穰要須度畎畝修復先北方

漕夫盡歸農，畚鍤各不遑。刀劍化耒耜，盜賊更不防。擔負徧都市，無用招販商。上下庶交足，薄海書平康。不然變法始，那免民惶惶。直言會羣進，聖人方垂裳。

酬張詠仙

行年五十方爲縣，苦恨之官尙大難。何似一甌常兀坐，未應八口便無餐。幾人得署陽城考，自昔空彈貢禹冠。我更爲君商出處，臨風無那一長歎。

冬夜

羈人耿不寐，寒夜燈無光。忽聞荒雞聲，攬衣起旁皇。庭前看積雪，冷氣不可當。陽春歎久逝，百草誰爲芳。念昔志節士，拔劍舞中堂。功名不早立，老去空悲傷。悲傷亦何已，役

役猶非鄉千秋一瞬息四望心茫茫

庭前積雪聚成兩山朝來忽失所在喜而有作

開門失兩山豁然快人意此山自何來本是天公戲雖無
萬仞高亦作漫天勢高堂鬱崔巍空庭暗遮蔽瞻仰笑路
人泰岱若無異堅知藉風尖澆豈畏湯沸所恃惟晦陰儼
可久長計豈料春默回旭日當霄麗傾刻化流澌還此階
前地不見楊家山歎息千秋寄

寒夜課孫作

畏寒不出門日擁一氈坐酸風刺檐隙尖利欲冰陞指凍
管怕拈袖縮墨不污憶昔少壯時顛倒逼寒餓僕僕風塵
中不自恤勞瘁老親每我憐補綴敝裘破親今在何處布

詞林典故卷一
一
余任僵卧往恨焉可追良辰痛倏過廢學況已久誰更箴
我情聞道定何日姑自幼孫課

次韻答寄邵子顯

失卻歸帆江上看宵深還自倚闌干懽愁欲訴都無據出
處重商兩覺難悔託鱗鴻麻更折怕聽風雨竹頻刪舊交
零落知同感輾轉相思夢得安

悼亡妾

傷離恨別欲誰知憔悴春來已不支強曳羅裙黯無語玉
梅花下立多時

老去情懷每自憐藥爐相對惜纏綿不堪小閣重帷裏侍
我添香只兩年

寫愁

出愁入亦愁愁至本非偶或謂酒可澆我偏不能酒放懷
六合間何事足哆口屈原沈湘江陶潛困五斗攬轡願終
虛牛衣泣徒負誰能畢此生筮易但无咎推排人間世筋
骨日衰朽雖聞日者言歲行幸過酉憂心終難忘勸歸屢
我婦先天骨肉親零落已八九有妹亦垂白操勞尙井臼
遠望隔千里寸衷得我剖同族盡困窮誼難分薄厚吾力
贍未能思之頗顏忸淒淒雨風聲宵來逼窗牖伏枕耿不
眠輾轉彼蒼叩

意苕山館詩稿卷十終

孫潤庠曾孫家振校字